



舊唐書卷七

後晉司空同中書門下平章事劉

昫撰

本紀第七

中宗 睿宗

中宗太和聖昭孝皇帝諱顯高宗第七子母曰則天順  
聖皇后顯慶元年十一月乙丑生於長安明年封周王  
授洛州牧儀鳳二年徙封英王改名哲授雍州牧永隆  
元年章懷太子廢其年立爲皇太子弘道元年十二月  
高宗崩遺詔皇太子柩前卽帝位皇太后臨朝稱制改  
元嗣聖元年二月皇太后廢帝爲廬陵王幽於別所其

年五月遷於均州尋徙居房陵聖厯元年召還東都立  
爲皇太子依舊名顯時張易之與弟昌宗潛圖逆亂神  
龍元年正月鳳閣侍郎張柬之鸞臺侍郎崔立暉左羽  
林將軍敬暉右羽林將軍桓彥範司刑少卿袁恕己等  
定策率羽林兵誅易之昌宗迎皇太子監國總司庶政  
大赦天下鳳閣侍郎韋承慶正諫大夫房融司禮卿韋  
慶等下獄甲辰命地官侍郎樊忱往京師告廟陵司刑  
少卿兼王府司馬袁恕己爲鳳閣鸞臺平章事乙巳則  
天傳位於皇太子丙午卽皇帝位於通天宮大赦天下  
唯易之黨與不在原限爲周興來俊臣所枉陷者咸令

雪免內外文武官加兩階三品已上加爵二等入五品  
等特減四考大酺五日以并州牧相王旦及太平公主  
有誅易之兄弟功相王加號安國相王進拜太尉同鳳  
閣鸞臺三品公主加號鎮國太平公主仍賜實封通前  
滿五千戶皇親先被配沒者子孫令復屬籍仍量敘官  
爵出宮女三千丁未天后徙居上陽宮庚戌鳳閣侍郎  
同鳳閣鸞臺平章事張柬之爲夏官尙書同鳳閣鸞臺  
三品封漢陽郡公鸞臺侍郎兼檢校太子右庶子同鳳  
閣鸞臺平章事崔玄暉爲守內史封博陵郡公袁恕己  
同鳳閣鸞臺三品封南陽郡公敬暉爲納言平陽郡公

桓彥範爲納言譙郡公並加銀青光祿大夫賜實封五百戶右羽林大將軍遼國公李多祚進封遼陽郡王賜實封六百戶內直郎駙馬都尉王同皎爲雲麾將軍右千牛將軍琅邪郡公食實封五百戶並賞誅張易之兄弟功其餘封各有差上天后尊號爲則天大聖皇帝二月甲寅復國號依舊爲唐社稷宗廟陵寢郊祀行軍旗幟服色天地日月寺宇臺閣官名並依永淳已前故事神都依舊爲東都北都爲并州大都督府老君依舊爲立元皇帝諸州百姓免今年租稅房州百姓給復三年改左右肅政臺爲左右御史臺韋承慶貶高要尉房融

配流欽州中書令楊再思爲戶部尙書同中書門下三品京留守太僕卿同中書門下三品姚元之出爲亳州刺史己未封堂兄左金吾將軍鬱林郡公千里爲成紀郡王左金吾衛大將軍實封五百戶令貢舉人停習臣軌依舊習老子甲子立妃韋氏爲皇后大赦天下內外官陪位者賜勳一轉大酺二日后父故豫州刺史玄貞爲上洛郡王后母崔氏贈上洛郡王妃初韓王元嘉霍王元軌等自垂拱以來皆遭非命是日追復官爵令備禮改葬有胤嗣者卽令承襲無胤嗣者聽取親爲後詔九品已上及集朝使極言朝政得失兼舉賢良方正直

言極諫之士丙寅左散騎常侍譙王重福貶濮州員外  
刺史不知州事特進太子賓客梁王武三思爲司空同  
中書門下三品加實封五百戶通前一千五百戶丁卯  
右散騎常侍定安郡王駙馬都尉武攸暨封定王爲司  
徒更加實封四百戶通前一千戶辛未上往觀風殿朝  
天后太尉安國相王旦固讓太尉及知政事遂從其請  
甲戌國子祭酒祝欽明同中書門下三品黃門侍郎知  
侍中事韋安石爲刑部尙書罷知政事丙子諸州置寺  
觀一所以中興爲名丁丑武三思固讓司空同中書門  
下三品武攸暨固讓司徒封王許之改封義興郡王重

俊爲衛王北海郡王重茂爲溫王三月辛巳追復故司空英國公李勣官爵令所司爲起墳改葬甲申制文明已來破家臣寮所有子孫並還資廕其揚州構逆徒黨唯徐敬業一房不在免限餘並原宥丁亥廢左右司員外郎其酷吏劉光業王德壽王處貞屈貞筠劉景陽等五人雖已身死官爵並宜追奪景陽見在貶祿州樂單尉丘神勣來子珣萬國俊周興來俊臣魚承暉王景昭索元禮傅遊藝王弘義張知默裴籍焦仁亶侯思立郭霜李敬仁皇甫文備陳嘉言等雖已身死並宜除名唐奉一配流李秦授曹仁哲並改與嶺南遠惡處己丑中



書侍郎兼檢校相王府長史南陽郡公袁恕已爲中書  
令兼檢校安國相王府長史詔曰君臣朝序貴賤之禮  
斯殊兄弟大倫先後之儀亦異聖人之制率由斯道朕  
臨茲寶極位在崇高負辰當陽雖受宗枝之敬退朝私  
謁仍用家人之禮近代以來罕遵軌度上及公主曲致  
私情姑叔之尊拜於子姪違法背禮情用惻然自今已  
後宜從革弊安國相王某及鎮國太平公主更不得輒  
拜衛王重俊兄弟及長寧公主姊妹等宜告宗屬知朕  
意焉先是諸王及公主皆以親爲貴天子之子諸姑叔  
見之必先致拜若致書則稱爲啟事上志欲敦睦親族

故下制革之庚寅衛王重俊上洛州牧王乘駟馬車鹵簿從諸王公已下中書門下五品已上及諸親並祖送禮儀甚盛事畢賜物有差辛卯以故司僕少卿徐有功執法平恕追贈越州都督并授一子官戊戌左右千牛衛各置大將軍一員罷奉宸府官員以安北大都護安國相王旦爲左右千牛大將軍每大朝會內供奉丙午改秋社依舊用仲秋戊申相王旦於太常廳上王公諸親祖送衛尉張設光祿造食禮畢賜物如衛王上洛州牧之儀夏四月乙丑端州尉魏元忠爲衛尉卿同中書門下三品甲戌左庶子韋安石爲吏部尚書太子賓客

李懷遠爲右散騎常侍右庶子唐休璟爲輔國大將軍  
右庶子崔玄暉爲特進檢校益州大都督府長史判都  
督事右庶子西留守戶部尙書弘農郡公楊再思爲檢  
校揚州大都督府長史判都督事少詹事兼侍讀國子  
祭酒祝欽明爲刑部尙書並依前知政事以上在春宮  
故僚也乙亥張柬之爲中書令戊寅追贈郡王重潤爲  
懿德太子同官縣大雨雹燕雀多死漂溺居人四百家  
遣使賑給五月壬午遷武氏七廟神主于西京崇尊廟  
東都創置太廟社稷戊子制依舊以周隋爲二王後壬  
辰封成紀郡王千里爲成王癸巳侍中敬暉封爲平陽

郡王侍中桓彥範扶陽郡王賜姓韋氏中書令張柬之  
漢陽郡王中書令袁恕已南陽郡王特進崔玄暉海陵  
郡王並加授特進罷知政事吏部尚書韋安石爲兼中  
書令兵部尚書魏元忠爲兼侍中丙申皇后表請天下  
士庶爲出母爲三年服年二十二成丁五十九免役癸  
卯降梁王武三思爲德靜郡王定王武攸暨爲樂壽郡  
王河內王武懿宗等十餘人並降爲國公甲辰特進芮  
國公豆盧欽望爲尚書左僕射輔國大將軍酒泉郡公  
唐休璟爲尚書右僕射依舊同中書門下三品丙午制  
以鄒魯之邑百戶爲太師隆道公宣尼采邑用供薦享

又授裔孫襲聖侯崇基朝散大夫仍許子孫傳襲六月  
丁巳河北十七州大水漂沒人居癸亥尙書左僕射豆  
盧欽望軍國重事中書門下可共平章檢校中書令韋  
安石中書令兼檢校吏部尙書檢校侍中魏元忠兼檢  
校兵部尙書楊再思兼戶部尙書兼檢校中書令丁卯  
祔孝敬皇帝神主於太廟廟號義宗非禮也戊辰洛水  
暴漲壞廬舍二千餘家溺死者甚眾秋七月辛巳太子  
賓客韋巨源同中書門下三品乙未以特進漢陽郡王  
張柬之爲襄州刺史仍不知州事八月戊申以水災令  
文武官九品以上直言極諫河南洛陽百姓被水兼損

者給復一年甲子追冊故妃趙氏爲恭皇后尊敬妃裴氏爲皇后乙亥上親祔太祖景皇帝獻祖光皇帝世祖元皇帝高祖神堯皇帝皇祖太宗文武皇帝皇考高宗天皇大帝皇兄義宗孝敬皇帝神主于太廟皇后廟見丁丑御洛城南門觀鬪象九月壬午親祀明堂大赦天下禁化胡經及婚娶之家父母新亡停喪成禮天下大酺三日戊戌太子賓客韋巨源爲禮部尙書依舊知政事冬十月癸亥幸龍門香山寺乙丑幸新安改弘文館爲修文館辛未魏元忠爲中書令楊再思爲侍中十一月戊寅加皇帝尊號曰應天皇后尊號曰順天壬午皇

帝皇后親謁太廟告授徽號之意大赦天下賜酺三日  
己丑御洛城南門樓觀潑寒胡戲辛丑衛王重俊爲左  
衛大將軍遙領揚州大都督溫王重茂爲右衛大將軍  
遙領并州大都督十二月壬寅則天皇太后崩

二年春正月丙申護則天靈駕還京戊戌吏部尙書李  
嶠同中書門下三品中書侍郎于惟謙同中書門下平  
章事閏月丙午朔置公主府官員乙卯以特進敬暉桓  
彥範袁恕己等三人爲滑洛豫刺史二月乙未刑部尙  
書韋巨源同中書門下三品遣十使巡察風俗丙申僧  
會範道士史崇玄等十餘人授官封公以賞造聖善寺

功也三月甲辰中書令韋安石爲戶部尙書罷知政事  
戶部尙書蘇瓌爲侍中京留守乙巳黃霧四塞唐休璟  
請致仕許之庚戌殺光祿卿駙馬都尉王同皎壬子洛  
陽城東七里許地色如水側近樹木往來車馬歷歷影  
見水中經月餘乃滅是月大置員外官自京諸司及諸  
州佐凡二千餘人超授闈官七品已上及員外者千餘  
人壬戌贈后父韋立貞太師益州都督夏四月甲戌又  
贈立貞爲鄴王立貞弟四人並贈郡王已卯左散騎常  
侍同中書門下三品李懷遠請致仕許之辛巳洛水暴  
漲壞天津橋六月戊寅特進朗州刺史平陽郡王敬暉



貶崖州司馬特進亳州刺史扶陽郡王桓彥範瀧州司  
馬特進郢州刺史袁恕已賓州司馬特進均州刺史博  
陵郡王崔立暉白州司馬特進襄州刺史漢陽郡王張  
柬之新州司馬並員外置長任舊官封爵並追奪秋七  
月丙午立衛王重俊爲皇太子丙寅中書令兼檢校兵  
部尚書齊國公魏元忠爲尚書右僕射兼中書令仍知  
兵部事吏部尚書李嶠爲中書令刑部尚書韋巨源爲  
吏部尚書依舊同中書門下三品庚午禮部尚書祝欽  
明爲中丞蕭至忠所劾前左散騎常侍李懷遠爲左散  
騎常侍同中書門下三品東都留守九月祝欽明貶青